

摘藻堂四庫全書薈要

集部

欽定四庫全書薈要

集部

御選明詩卷三十六

詳校官原任主事臣李斯咏

欽定四庫全書薈要卷一萬八千五百三十六

集部

御選明詩卷三十六

七言古詩一

劉基

題老翁騎牛圖

白日上悠悠竹梢霧已收  
晴天不易得及時當放牛  
鄰家放牛多兒童我家無兒  
只老翁寒衣在機織未就原  
上烈烈多高風勿言衰老筋  
力薄有牛可放殊不惡但

願天公不相惱牛背閑眠飢亦好

為丘彥良題牧谿和尚千鴈圖

往時惠宗畫蘆鴈對之如在江湖遊只今此圖又精妙  
中有千里瀟湘秋乃知浮屠性多巧意匠不與凡夫儔  
吳松江長具區闊天目虎丘青一髮西風九月秔稻黃  
朔鴈飛來翼相戛農夫苦飢鴈獨飽此意畫師應識察  
近者分明辯羽毛遠者縹緲瞻秋毫或乘飄風入煙霄  
或翳落日沈隍濠起如武侯布八陣集如萬舞回旌旄



眠沙臥草鳴且翔喋呷藻荇亂蓬蒿禾空穗盡却歸去  
紫塞漠漠春雲高我家南山限蒼嶺鴈飛不到川路永  
深林大谷蛇豕盛愁向他鄉撫虛景人言鴻鴈比弟兄  
我有兄弟隔兩城題詩卷畫謝客去無使感愴傷中情

題富好禮所畜村樂圖

我昔住在南山頭連山下帶清溪幽山巔出泉宜種稻  
繞屋盡是良田疇家家種田恥商販有足嬾踏縣與州  
西風八月淋潦盡稻穗櫛比無蝗蟲黃雞長大白鴨重

瓦甕琥珀香新筍芋魁如拳栗殼赤獻罷地主還相酬  
東鄰西舍迭賓主老幼合坐意綢繆山花野葉插巾帽  
竹箸漆椀兼甕甌酒酣大笑雜語謔跪拜交錯禮數稠  
或起頓足舞侏儒或坐拍手歌甌簍傾杯倒榼混醯醬  
爛漫霑漬方未休兒童跳躍坐喧譟執遁逐走同俘囚  
出門不記舍前路顛倒扶掖迷去留朝陽照屋且熟睡  
官府亦簡少所求寧知晏安含酖毒耒耜一變成戈矛  
高門大宅化灰燼蓬蒿瓦礫塞道周春燕營巢在林木

深山露宿隨猿猴三年避亂客異縣側身天地如浮漚  
親朋阻隔童僕散疏食水飲不自謀有時惆恍夢間里  
驚覺五內攢百憂君家畫圖稱絕妙鑒別曾遇柯丹丘  
想應臨搦出祕府筆意精到世罕儔村歌社舞自真率  
何用廣樂張公侯太平氣象忽在眼令我感愴涕淚流  
近者鄉人來報喜今歲高下俱有秋豺狼食飽臥窟穴  
軍師已運招安籌人情自古共懷土况乃霜雨淒松楸  
神龜且被豫且困予所勿念天我尤積薪厝火非遠計

誰能獻納陳嘉猷長江波浪接淮泗白日慘澹騰蛟蚪  
天下農夫總供給隴畝不得安鉏耰市中食物貴百倍  
一豕之價過於牛魚鹽菜果悉買米官幣束閣若贅瘤  
朝餐僅了愁夕膳誰復有酒澆其喉循環天運往必復  
邪氣暫至不遠瘳此生此景須再覩引領悵望心悠悠  
為啟初門和尚題山水圖

天下名山隨處有畫圖流傳亦良久祇園道人展橫幅  
觀者稱誇同一口蒼梧九疑高挿天卷而懷之不盈手

巨靈驚呼盤古怒地軸塊坳昆侖剖太陽出海開杳冥  
嶠冢岷峨大如斗華軒無人清晝閑恍然置我匡廬間  
金輪迴出牛女上遠近羅列千雲鬟江花野竹青錦斑  
嵌巖斷石蛟鼉顏岡盤谷轉絕徑路但見湖水迴瓊環  
白沙洲暖春風起南船掛帆北船艤吳波不盡芳草外  
楚岫半入長煙裏夜深小龍行雨歸宮亭月落彭郎磯  
旌陽步虛廬老和雜佩散作虹蜺飛百年塵世真夢寐  
回首旌旗塞天地舊遊何處成渺茫一曲狂歌數行淚

青丘弱水迷方壺武陵桃源今有無  
瑤臺三島消息斷  
安得羽翼歸清都

為祝彥中題山水圖

高軒玲瓏不受暑半幅輕綃宿煙雨  
白屋素壁生空明  
似聞水聲繞庭宇松髯拂天藤蔓垂  
枯根瘦石相因依  
寒濤不驚虎兕臥嵐翠欲與蛟虬飛  
空江悠悠一漁艇  
渚白沙明萬魚靜  
武陵桃花何處尋  
落日微風片帆影

寄宋景瀛

我思古人乃在仙華之山山前夜半挂河漢天津兩旗  
俯可攀我欲從之阻河關初平不來白羊死瘦骨蝕盡  
莓苔頑風沙蕭蕭隔人間玄霜日夕凋玉顏有鳥有鳥  
丁令威側身下上空孤飛女媧石墜黿腳折海水散作  
雲霏霏山中有奇樹一花一千秋美人何不折寄我使  
我歎恨長凝眸深沉洞谷山鬼集陰氣六月冰霜留嗟  
哉美人誰與儔明年定約赤松子與爾羣峯頂上遊

送姚伯淵之清溪河泊所任

清溪之水通秋浦石白水清魚可數  
鰈鰕鱗鯪鱖與鱖  
小魚如鍼大如杵侵晨漁艇浮空來  
千夫撒網雲煙回  
鳴榔擊楫聲如雷水怪駭啄珠宮  
開課魚使者矢魚急  
馮夷噓唏龍母泣琴高赤鯉縱有神  
何暇超騰作人立  
吾觀大江之中有壯魚名曰海豨  
頭如豬羣行九十其  
朋徒歆沫成雨倏歛盲風俱旌陽  
仙人上天去已久  
平地波濤隨處有春淵潛鱗陟負  
冰時哉罔俾虞人後  
小魚瑣碎獺所捐大魚多膏祇自煎  
君不見振振鷺白如



玉沙頭見魚飢不啄一朝飛上瑤華池紫鵝黃鵠相追  
隨俯視禿鶴垂六羽還共野鳥爭腐鼠

為詹同文題浙江月夜觀潮圖

君不見四時平分成歲功以秋繼夏獨不同炎官挾長  
握天柄七月赤日熇玄宮蓐收抱鉞蹲白水野氣赫赫  
攄頽虹陽侯喘汗河伯暘少昊上訴愁天公會須萬物  
長養遂斯以仲月虛宵中此夜姮娥魄正滿命駕四蟾  
驂兩駢指揮禺強出玄渚蕩滌歆煬清霾蒙河漢發源

牛斗下曲江上與天津通初看一髮起溟徼如曳組練

來於東漸聞殷駢鼉鼓發倏忽萬雷聲撼風天吳掉尾

出溟津馬銜揚鬐招海童霓旌縞帳鷺羽幃瑤臺十二

浮空濛蕊珠仙人乘玉輅騰駕鶴鵠飛氄氄長庚歛霍

挾光耀靈母扶龍嗥戛銅宓妃起舞素女從瓊珮綵綵

雲帡幪冰綃霧縠紛颯纚霜旂雪旛高翳空鯨魚呀呿

鮫鰐遁蒲牢哮吼馮夷宮瞿唐巫峽起平地灩澦若象

廕回漉先驅已過赤亭嶂後從始發龕山砧商聲爽淅

合羣籟澤國凜凜寒欲凍先生翫月坐樓上夜氣澄寂  
神和沖憑闌快靚煩暑退呼兒命酒澆喉嚨自舞自歌  
歌自作月照白髮三千總歌聲迤颺林壑應竹樹戛擊  
絲與桐淵魚躍波棲鳥作紫桂繞屋清香融君歌曲終  
響未終我歌激烈留征鴻瞳眸相視俱老矣况有衆病  
來交攻聖明天子御宇宙威惠與天相比隆首丘儻許  
謝韞絆猶有古月光瞳朧行當唱和三百首永與潮汐  
流無窮

贈杜安道

憶昔天兵伐荆楚，舳艫蔽江齊萬櫓。  
譟聲激烈似雷霆，猛氣剋然震貔虎。  
拔柵皖城猶俯拾，探穴九江無險阻。  
明年大戰康郎下，日月埙圯相吞吐。  
馮夷蹋浪羣水飛，巨鼇掉首三山舞。  
雲隨太乙擁鋒旗，鼉為豐隆作靈鼓。  
將軍金甲箭攢蝟，戰士鐵衣汗流雨。  
火龍嬉燄絳天衢，燧象飀煙煎地府。  
鯨鯢既翦橈，槍落草木熙陽魚出谷。  
當時從臣皆俊良，近侍共推徐與杜。  
或操陳子之刀鐏，

或負伊公之鼎俎艱難出入矢石下鞠躬盡力無摧阻  
夙興夜寐事一人小心不貳帝臨女只今四海同車軌  
葑菲罔遺遵往古瓊琚赤芾邁鵷行鞍馬祿食光門戶  
天雞一聲金闕啟龍顏有喜常先覩顧我愚疎憂患集  
病骨峻嶒蒸溽暑興來懷舊倚長歌星星兩鬢絲千縷  
潛溪圖為宋景濂題

金華山水天下希潛溪龍門尤絕奇羣峰峻極河漢上  
一峯獨立芙蓉陂先生結廬在其下文追班揚無賈馬

遂令此山增壯觀野有樸樾皆梧櫟上清道士方方壺  
乘興為作潛溪圖丹崖翠麓神仙居東望日出樹如蘇  
溪流穿林還度谷十里一達五里伏龍湫吐景生白虹  
藤蘿振雨松呼風却憶往時清夜月帝女乘雲下天闕  
鐘鏞鏗鉤簫鼓發霓裳羽衣飄滅沒初平騎羊前啟行  
長髯鬢鬢飛玉霜秦娥吹笙玄鶴舞牽牛河鼓凝寒芒  
相思迢迢頻入夢夢駕兩鸞從一鳳覺來毛髮猶爽淅  
目送征鴻度空碧山有疏水有魚幽澗有泉清可斟何

時上疏乞骸骨寄聲先遣雙飛鳧

枯樹圖歌

道傍古樹身半枯白蟻穴根蟲穴膚風摧雨撼霜雪凍  
斷石艱碗無人扶憶昔勾芒肇初政百卉騰達隨呵噓  
新柯荏苒舊柯壯霧露膏沐光如濡黃鸝翡翠語嬌滑  
桑扈戴勝鳴相呼白鶴來巢鹿止蔭匠石愕睨爭歎譽  
寧知憂患生旦夕野火倏忽起不虞燎原烈焰難嚮邇  
孰問柞櫟杉與楮枝燔葉煥根半赤朽腐瞞液非時須

山林搖落歲方晏聊以薜荔為衣袂嗚呼廣廈棟梁具  
委棄草莽同薪芻皇天未必替生意更盼玉燭回陽鳥

寄江西黃伯善兄弟

我思美人乃在洞庭之陽彭蠡之陰衝波亘天三百里  
離恨比之應更深揚瀾咆哮左蠡怒白日慘慘玄猿吟  
欲往從之憤余心龜鼉鼉琬不可以駕風縱縱兮雨淫  
淫望厭原之飛煙邈匡廬之高岑虹旌兮翠羽昌容兮  
鳳皇舞蒹葭衣兮菡蓩襟玉笙吹兮紫鸞音望不見兮悲莫



任

陳彥德以畫見贈詩以酬之

君不見昔日米南宮又不見今時趙學士能將翰墨爭  
鬼工天下流傳名父子枯蒼處士身姓陳小郎英俊尤  
可人欲收大地入掌握筆意所到如有神曉移小幅來  
贈我紅日滿窓花婀娜開軒展視心眼寬如在岳陽樓  
上坐湖波吹煙入遠山君山乃在湖中間蒼梧九疑隔  
湘浦孤雲目斷幽篁斑漁舟一葉來何處巫峽雨昏啼

鵝暮澤畔行人久不歸沙上輕鷗自飛去陳公子聽我  
歌深林大谷龍蛇多蓬萊三島可避世欲往其奈風濤  
何

宋濂

秋夜與子充論文退而賦詩一首因簡子充并  
寄胡教授仲申

太虛之氣隨物形天聲地聲由此生小或簸盪吼河海  
大將觸搏流風霆天輪膠戾神鬼戰地軸挺拔蛟龍爭

園曰洼汙各異奏影沙礪石咸齊鳴靈功闔闢司至理  
于喁徐疾緣天成熟言塊圪妙不測兩間可配人為靈  
戴首載跌上下位布藏列府山河縈肺為金官號鐘磬  
發聲聲氣從孩嬰自茲人音極萬變出無入有誠難名  
啞啞吐咤洩忿懣歎呼號攄幽情吻牙喉舌審清濁  
徵羽宮商分重輕殊方雖假象胥譯至道不與人偽并  
凡丘降神繼羣聖因聲為教文諸經研窮陽陰序政事  
吟咏情性臻和平節文嚴謹名分正假象植義昭天明

玄景無言聖人代建中立極綏羣萌莫安海嶽使效職  
洗摩日月開重冥籟鳴機動孚應速風聲所被來頻仍  
宋齊魯衛既霧消蔡陳秦楚尤雲蒸孺臍真腴造閩粵  
舐排卑論歸崇欲太和融盡沾丐物無疵癘玄休凝  
杏壇迹蕪鐸聲遠人鑒私智爭先登鈎籍捫闔勢傾軌  
堅白同異時輟較黃老玄虛涉溟滓刑名慘覈紛崢嶸  
九家狂流不可遏絕港強欲齊東瀛固云偏鑿或害教  
尚騁所學為驍騰狂秦以降逮劉氏不翅枯響隨風行

黃茅白葦墮一色編貝聯珠誇九能班揚枚馬亦豪雋  
竟溺下俗高難升六代駢枝與儷葉氣漸辭類猶驕矜  
更唐歷宋非不盛律之六藝終難勝要知聲華有衰歇  
以致學步多齡嬾人文本為載道具次則紀事垂千齡  
雖其功用霄壤隔不應澗水非淵冰璽書播告出丹鳳  
兵檄馳布飛紅星金匱石室董狐筆戎功駿烈燕然銘  
入室登歌侑廟樂徇師能誓宣牲盟章疏補天非鍊石  
談辯保國踰長城霑潤自足配雲雨和協更可同簫笙

當其操觚欲鼓勇收視返聽探玄精游魚中鉤曳深沚  
鉅獸投弇離叢坳斯須朝崖變夕谷惚恍西海為東陵  
精神所至萬物懾索籥亭毒縱復橫真醇魯邦見郅鼎  
冲雅高辛陳五韻渾圓牘應振逸響縟麗鷗雀梳文翎  
嚴森五刑布秋肅華澗百卉含春榮勁如韓彭將貔虎  
仰揭斗柄麾欃槍豔如長楊較羽獵蒙盾負羽驅鸞旌  
高排霄漢跨箕尾呼噏沆瀣游太清未幾直墜九淵底  
察之無跡聞無聲幽入陰宮作鬼語祕怪詼詭難為聽

剗然大明赤於火景曜所鑠流為瓊似茲妙幹造化軸  
可以小技相譏評金石雖堅有銷泐文光亘古常晶熒  
但憂拙工不知變欲就郊衢施鼎錡揖讓周旋固有節  
其如縣蕤非法程予從巾角業文史意逞驍悍摧強勅  
上師姬孔為察父下視遷固猶諸兄嬰弓射侯在正鵠  
路馬在御懸游纓溫溫膩紋蟠結綠熒熒寒電生青萍  
有時擣辭述帝霸捷如屋上人建瓴注空直瀉絕留礙  
不似潢潦為泓渟應知敦本乃末豔且咤彪外由中弼

年來懲艾劇芒刺流汗浹背顏交頰如何竄身伏槁壤  
乃能抗志凌霄崢閼宮清廟須巨木梁葩楚豔徒微馨  
譬之出聲有鉅細大塊噫氣真鏗鉤蛙鳴蟬噪雜鼓吹  
入耳惟覺成嚶嚶天人之間或有愧何異冠服蒙狸狔  
遙江上月素珠吐嘉樹弄景癡龍擎維時萬籟一時寂  
耿耿銀河涵玉繩華川先生起我懶褰衣踏月行空庭  
揚今推古益慷慨抽關啟鑰成櫻寧先生文章正用世  
殷盤周誥方爭衡知深固懽管鮑淺交固未數金石貞



念斯輾轉不成寐吟聲在吻號蒼蠅酸寒固或類貞曜  
跡弛未必卑韓翃故人守官在姑蔑學林老虎文淵鯨  
三年不見志紆鬱夢魂時逐晨風征何時共宿若今夕  
重把肝膽殷勤傾

畫山水圖

遠山刷翠弓眉彎一江橫遶羅帶環沙磯互作犬牙入  
水痕初落猶斑斑漁舟三兩自何處後先撐出蘆花灣  
解網得魚長尺半沽酒踏破荒煙酸西南冥茫見樓閣

朱碧隱現青雲端不知神仙何洞府但見白道屈折蛟  
蛇蟠月明如霜夜將午定有笙鶴來瑤壇松間醉坐誰  
氏子羊裘梭屨逍遙冠豈非東蒙山中舊隱士面目猶  
帶河朔氣塵頑黃庭懶讀尚銜袖仰視松葉秋翻翻我  
生素有山水癖向之不覺開心顏恍如西上黟川灘臥  
聽灘水流潺湲又如東對仙華山青天飛下千巒岼巖  
雪藏陰凝太素竇泉濺沫排空寒便將此地窮天慳青  
鞋布襪恒躋攀蓮花五色猶未吐晝明夜照如神丹人

言絕頂有風穴高入蒼莽天曼曼天曼曼兮氣盤盤融  
作玉瀝從空溥服之龜鶴共長久一任人寰日月雙跳  
丸白苔為我梳仙鬟雙成為我開瓊關吁嗟乎吾將終  
老山之間吁嗟乎吾將終老山之間

題李太白觀瀑布圖

長庚熒熒天之章精英下化為酒狂匡廬五老森開張  
銀河萬丈掛石梁下馬傲睨立欲僵聳肩袖手神揚揚  
憶昔開元朝上皇宮中賜食七寶牀淋漓醉墨蛟龍襄

人疑錦繡為肝腸麾斥力士如犬羊營營青蠅集于房  
金鑒不復承龍光并州可識郭汾陽不可丹陽逢永王  
大風吹沙日為黃狡獪哀啼聞夜郎蒼天欲使詩道昌  
頓挫萬物歸奚囊何處更覓延年方北海天師八尺長  
芙蓉作冠雲為裳授以蕊笈青琳琅蓬萊屹起瀛海洋  
羣仙遲汝相徊翔誰將粉墨圖縑緗顧我一見心張張  
詩成仰視天蒼茫夜半太白生寒芒

陶安

至正戊子下第南歸與同貢黃章仲珎雷燧景  
陽同舟仲珎賦詩因走筆次韻

鳳城酒美燕姬歌禁花紅飄金水河雨香翠島春晝暖  
魚龍陸海揚風波天門咫尺到不得奈此飈摧雲翼何  
時乎未至應有待壯年不必傷蹉跎君看松柏成大材  
歷歲雪霜誰見過拂衣南出指歸路回首京闕山蹉我  
日高原頭紅霧散潮平沽口青銅磨牽船汴流狂吹逆  
登車避閘飛塵多黃樓憑河遠眺望身如冥鴻超網羅

客塗笑語浣羈思詞鋒捷出如揮戈天生人才必用世  
豈無文藻宣金科鸞臺鳳閣總華要不然玉署聯鳴珂  
丈夫小挫未為辱正氣耿耿非有它匣中古硯助神變  
銅蟾飽水手屢摩隨身亦有勲業鏡依然照我顏色酡  
與君今日動高興買酒共酌澆天和

五月旦日與黃仲珍雷景陽酌于維揚抵暮出  
城曉至瓜洲有懷同貢金景蘭姚仲誠周于一  
林元凱相約不至更次韻為別以寄拳拳之餘

意

蕩舟竹西聞好歌飄如仙槎泛銀河青樓傍市捲朱箔  
舞裾綠皺如春波香消紅藥采鸞去其如青鏡寂寞何  
金盤露清筍牙白小住半日非蹉跎雪乳泉甘醒午醉  
瓊花霧散與客過吹簫玉人杳然逝橋亭拂柳空栽栽  
櫓聲帶晚出城去初月光吐新鎌磨梅天雨歇黃潦漲  
瓜洲渡近青山多我懷初歸有髦士金姚學富精蒐羅  
閩南周林師友盛未見入室操吾戈賦妙能追司馬聖

策高反黜劉蕡料荆門有約久未至回望不見玲瓏珂  
黃君雷君吟嘯共蕭然行李餘無它客途分襟心暫苦  
詞場秉筆肩還摩江流如黛送孤棹離觴不辭顏易配  
佳哉璞玉當見遇肯使抱恨同卞和

廣陵楊節婦

堂上舅姑嗟老苦膝下兒啼未能語孤鸞何心鏡中舞  
綵鬢年方二十五甘肯供餘勤鞠撫舅姑歡顏兒飽乳  
誓有一心無二主本欲同歸九原土手拋粉黛獨紉組



燈照空幃淚如雨  
嫠居守義能自許  
觸目艱難不憂沮  
夫天寥闊幾寒暑  
兒有文章輝藻黼  
竹西綺羅炫旁午  
翠箔珠簾闔嬌嫵  
五方雜俗日殊古  
貞烈無聞世何補  
斯人秉德天賦予  
乃以三從鑄肺腑  
春官旌名真盛舉  
共看光采生門戶  
丈夫明理蹈規矩  
鬚眉蒼蒼本翹楚  
為臣不幸遭險阻  
忠國立身當審處  
爵祿才猷輕一羽  
大節或虧何足取  
嗚呼大節或虧何  
足取不及閨中賢  
婦女

送庸田僉事

庸田使者乘輅車閱得太史河渠書姚江農民西引領  
庶幾來此我其蘇傷心今歲夏秋月甘雨不降禾苗枯  
海潮東西救不得老稚無異涸轍魚曩從官軍過州境  
編戶奔走頻供需計畝斂錢築城去役繁未見民力紓  
正逢稔歲亦飢餒遭此乾暵窘室廬往年有詔甚寬厚  
恩澤至今流海隅既蠲湖田主戶米亦減水深長蕩租  
皇華光臨浙江左忍視瘡痍無完膚曉霜方嚴問道路

冬雨未霽行泥塗我願歲豐水旱無公賦早輸私有儲  
國家富足民歡娛且免使者勤馳驅

紀事

壬寅十月初五日陰雨停雲天未夕江城暖氣驟蒸人  
蟬翼綃裳汗沾濕輕雷數聲生變化火氣轟山雷電赤  
長飈西來吹海立飛雨驚鳴建瓴急勢如萬騎怒衝擊  
對面相呼聽不得掩關漸是一更時爍眼金虬破昏黑  
蓮花碧礎迸出泉官市波濤湧三尺方當閉塞蟄蟲俯

卷三十六  
頓駭龍蛇離窟宅怪得秋來未降霜無乃天時有差忒  
陽氣至此本潛藏發泄深機不能密或占水旱在來年  
消弭災異當修德須臾河漢現疎星天地無聲本來寂  
小窓獨坐對殘燈尚有寒蛩語空壁

王禕

白翎雀圖

白翎雀雪作翎羣呼旅食啁哳鳴何人翻作弦上聲傳  
與江南士女聽南人聽聲未識形畫師更與圖丹青圖

丹青一何似知爾之生何處是秋高口子草如雲風勁  
腦兒沙似水

二月望在鞏昌客館夜夢歸里中與金十二丈  
傅九文學同遊高五處士別業既覺有感而賦  
東風解凍春二月東還隴西駐吾轍中宵好月入窓明  
孤館殊花應時發慷慨既罷倚醉眠夢裏迢迢返東浙  
我家住在縣烏傷奕世衣冠紹先烈青巖之下華川湄  
古木脩篁蔭門閭里中朋友不數人總角交游到華髮

金丈雖老文益昌傳子方強氣難遏縣南高叟故所居  
別墅新營最幽絕大田多稼廩不虛華屋有軒席常設  
自余便道過家時三載于今成闊別今日何日乃盍簪  
固應舊好三生結竹林藤簟坐崢嶸橘徑梅溪行蹙蹙  
篇章雜還詩句哦盤饌紛紜酒盃啜既誇荅客語成狂  
頗憐哭子言猶噎儼然相對如平生抵掌論心盡歡悅  
寒鐘驚覺頓無聊一點青燈自陰滅倍思故隱只山中  
却歎浮蹤向天末嗟我文章非古人虛名在世真叨竊

一從螭陛到鑿坡久侍清光入金闕每多杜甫能自期  
許身欲比稷與禹政圖事主盡愚疎豈意謀身轉迂拙  
肅將使指往西垂迢遞山河重跋涉嚴風裂面沙眯眸  
冰髯霜鬢莖莖折瘦馬衝寒不自禁狐帽貂裘仍狗襪  
得非博望泛仙槎無乃中郎持漢節道塗梗塞竟莫通  
使事還須遂中輟歸報吾君扣九重天顏咫尺容趨謁  
儻矜弱質賜恩光便向明時乞骸骨慈母手線猶滿衣  
先人遺書故盈篋鑑湖一曲非所望家山自可采薇蕨

十一月十日宿陳敬初館中臨別有作

歲十一月當嚴冬江湖水落潛蛟龍蕭條長塗客旅散  
而我買棹過吳淞茲行豈為飢餓逼念子高誼來相從  
托交同門已十載蒙被教益開愚癡時時彼此互有激  
譬持寸莛撞巨鐘姑蘇臺前攬秋色麗正門外尋春容  
中間欣戚每相繫要復終始猶駑蛩一自去春與子別  
旌旗滿眼紛縱橫及茲相見恍如夢中夜論議披心胃  
君言祿爵非所願但願擊壤歌時雍却因文章著不朽



韜晦養粹甘為農顧我所願頗異子謂欲與世相奔衝  
黃金鑄印錦懸綬時至未敢辭侯封丈夫出處雖二致  
非係愚哲由乖逢得意缺望亦常事所貴自寶如璜琮  
計長較短語輒久坐聽曙鼓聲鑿鑿人生會合良不易  
奈此物役相牽攻君留仍泛越來水我去猶對金華封  
區區離別不足惜且復醉子雙尊釀郊翔自附湜籍輩  
此事遠矣須追蹤

夏煜

讀宋太史潛溪集

混沌初判太素斲挺生神人  
斷鼇膊剖乾割坤奠海嶽  
厥俗鴻荒人未覺帝命圖書出  
河洛奇耦生畫參伍錯  
煥乎斯文此其璞二三啟運乘  
飛躍典謨訓誥雅頌作  
黍離以降周室削天將尼父為  
木鐸乃芟詩書定禮樂  
乃作春秋明善惡包羅萬象歸  
一勾放彌六合卷諸橐  
七十二子相唯諾才出中州氣  
渾朴及漢史記變矩矱  
西京雄健東差弱建安馬上詩  
橫梁其音稍振氣已駁

晉更六代轉銷鑠唐包九有復充斥至宋諸子雄相捕  
廬陵崛起超卓躒道州獨立承絕學後出新安最宏博  
有元將相皆沙漠往往南士登館閣從此斗牛氣磅礴  
乃挺奇才海東角蚤年脫穎何落魄貫穿經史探韜略  
出入佛老搜冥漠鯨跳鼇抃鬪蛟鱷不持寸鐵徒手縛  
大弨射日孰能彊長劒倚天誰敢斫是乃浩然之氣擴  
簸弄元化筆在握星辰迸空如石落剛風立海大雨雹  
湧湍疊躍濤怒搏百怪倏忽光揮霍矯若魚龍舞灩澦

蔚若虎豹跳穴寧飄若孤飛駕黃鶴勁若百鷲出玄鶚  
鉤鏗大音振咸濩赫奕雄芒射干鎔迫而察之吁可愕  
注如懸河思不涸大田五穀當秋穫武庫衆寶開晨鑰  
左右而取非外攫遂造平坦鏟磽确淙淙安流宗大壑  
上尊玄酒殊澹泊東序天球匪雕琢自然光燄發葩萼  
我時訪君即命酌春風蒲萄釀酥酪雪夜璫瑜擁鼉鼉  
招月與友相酬酢月入尊中明可捉漱嚙醲郁棄糟粕  
此時豪縱脫矰繳吐奇快怪安可約有鳥如火天井絡

掃除旬始銷格澤金篦刮目割翳膜郢斤斲鼻揮漫亞  
妙處神會不可度而我旁觀駭且忤如遇仙人授金藥  
一食生羽脫塵殼願為弟子請奇著先生忘言只大噓  
余亦斂衽逡巡却如此筆力扛鼎鑊不遇明主將焉泊  
聘以束帛加雙珥幅巾大布起林薄奏賦上林從楊柞  
豈比執戟甘寂寞天王手按龍泉鐔大振天聲重開拓  
勢若新篁解春籜用爾圖像為丹雘用爾作樂為簫籥  
銘功頌德軒寥廓日光月潔江漢濯前驅班馬鞭六駁

後駕歐蘇驂兩駱千載而下宛如昨碌碌餘子徒齷齪  
傑哉先生果何若微子之裔散人託景瀛其字大夫爵  
我作狂歌非用謔投以木瓜報芍藥

蘇伯衡

送曹叔溫赴淮安幕

初我識君自三山面如白玉顏頰顴平明振佩入烏府  
行人指點人中仙此身萍梗隨流轉淮水東西數相見  
時清事簡百不憂卮酒篇詩恣歡宴自從煙霧霾江湖

將軍無復能齊驅春鶯秋月兩寂寞尺素斷絕心煩紆  
今古江南佳麗地龍虎載瞻天子氣戔戔束帛貢丘園  
濟濟衣冠若鱗萃東華邂逅式相逢蕭騷短髮驚成翁  
青衫依舊陪驄馬風雨徒步追羣公過從更說舊遊好  
舊遊著處生芳草沈約樓前杜宇啼西施陂上芙蓉老  
京城官釀斗四千交歡安得青銅錢三嗅落花共一喙  
浩歌白石看青天盍簪方喜慰疇曩摻別那堪增養養  
寒潮浩蕩足秋霖木落江空欲何往紅蓮綠幕依黃堂

駕言擊楫趨山陽君才有用仍小試干將百鍊須善藏  
幾年爭戰今休息髑髏模糊土花碧韓信祖逖安在哉  
但見長淮搖落日世途反覆如浮雲人生離合矧可云  
天皇盛德同華勛肯使獨鶴終雞羣

郭熙關山雪霽圖

昔我北遊月在稽無旬犯雪度雄霸千里萬里皆瑤琨  
高迷丘垤低迷罅朔風烈烈塵不驚中夜蕭條但桑柘  
僕夫股慄面削爪身上破褐纔掩骼長途日暮行不前



回顧堪憐那忍罵前車既斷後車絕停驂獨宿道旁舍  
牀頭土銼鬱生薪村酒沽來敢論價臥聽櫪馬齒枯茲  
展轉無眠疑不夜忽然朝光入甕牖主僕瞥見互驚訝  
攬衣匆匆便蓐食如此清明喜天借可辭趨暖即前程  
翦拂蹇驢還自跨蘆溝凍合足練橫徑度不用修梁架  
西山馬首遙相迎拔起人言似嵩華瓊樓玉宇忽照眼  
行行已到南關下時清關吏殊可人不復誰何乃邀迓  
過關使客多於簇或挽柴車或高駕閑情我正繞剡溪

吟思誰歟似清灞道逢軒蓋何其都駿馬雕鞍蒙錦帕  
銀盆熾炭蠟光燃面面檐帷行酒肴徒御繽紛意氣麤  
錯金劍具青絲靶行人不解說姓名但說無非國姻婭  
狐裘貂帽詎知寒馳驅爭入柳林射當時有意欲賦之  
計吏相煎嗟不暇鶯花窈窕江南春風景依依在圖畫

贈徐季子

百金不惜市梔鞭兩耳不解聽朱絃人情如此亦何以  
我每見之獨慨然夫君懷寶起浙右掉鞅觀光來日邊

夙學人言破萬卷新製我喜窺幾編金莖玉露足秋爽  
林花澗草爭春妍紛紛牛毛豈不多振振麟角爾固專  
摘藻詞垣翻舍置採芹鄉泮仍留連所好者箏鼓者瑟  
猶枘以方鑿以圓陳平丰姿若冠玉酈生辯口如河懸  
禮意殷勤日三接華貫駁歷歲九遷由來利鈍係遭遇  
未必愚智殊天淵樂育菁莪亦已重況乃桑梓敢不虔  
去國不賦北門什還家徑上東吳船大材小試吾竊歎  
冷官不厭子乃賢謇子閱世候四十守官太學垂五年

包羞待問成倚席畢景兀坐寒無羶勲業空期螳附驥  
俯仰却笑夔憐蛇彼哉浮榮勿復道歸歟樂事言難宣  
會稽雲門最幽絕鑑湖剡水交漪漣玄猿嘯呼山近屋  
白鳥明滅江吞天雲間往往得靈藥月下時時聞采蓮  
多暇應為曲水會乘閑便作東山眠村翁溪友總愛客  
蕨芽蓴菜不計錢酒酣更斫銀絲鱠章就還洒蟬翼牋  
並遊只許鐵冠子同載應懷玉局仙願言留榻以相待  
一曲擬乞君王前

周伯寧春晴江岫圖為呂仲善題

尚書襟懷絕瀟灑揮毫往往凌董馬平生一筆頗自珍  
數尺新圖為君寫齊山遙接吳山青碧波萬頃孤帆征  
東風綠徧汀洲草總是岐亭離別情一向江南一江北  
離情浩蕩嗟何極正如江上之碧波縱有并刀那翦得  
當時已足令心愁如今況復隔羅浮掩圖却上高臺望  
但見遠海連天流暮歸朝出誰與侶蜃霧蠻煙結悽楚  
木棉花落鸚鵡飛苦竹叢深鷓鴣語

張孟兼

漫興二首

梨花半開夜雨催無奈  
李花如雪堆門外  
美人不見來  
東風楊柳吹千迴

青驄驕嘶金鞵街  
美人二月裁春衫  
江頭麥秀青蘄蘄  
西湖放船開錦帆

義門鄭仲舒先生得請歸  
浦江予於先生同里  
且親故賦是詩情見乎辭矣

鄭公去年離北平束書抱病來南京城隅邂逅喜且驚  
開顏握手言再生自從南北屢構兵日夜悵望鄉關情  
幾回寄書鴈南征中心搖搖若懸旌苦遭喪亂百病嬰  
客邊囊橐一旦傾此來四顧徒煢煢豈料吾子與合并  
我時聞之涕泗橫況公素有文章名居官勝國職最清  
經筵之擢轉庠黌及當玉署官已成又為奉常典藻盛  
人生際此自足榮但恨白髮已數莖懷哉屈子全忠貞  
誼與日月同光晶願言夕餐秋菊英佩明月璫紉茝蘅

懸河之論春雷轟使旁觀者顏發頰索居半載留帝城  
坐聽夜雨哦寒檠眼前倏忽時變更春風一見衰草萌  
公家孝義好弟兄遣兒千里來遠迎乃今得請荷聖明  
身若插羽乘風輕過門云別明遂行開船要趁蒸雨晴  
夜久不寐視長庚長庚欲落鐘鼓鳴庭樹喔喔聞雞聲  
崩緌起舞冠絕纓公歸我愁絲亂縈亦有夢寐懷先塋  
如過吾父款柴荆為言恨不同趨程終當早晚乞歸耕

危素



期馮祥甫不至

寒山壓樓三日雨風卷崩雲亞高樹山人無事不下樓  
空谷寂寥誰與語平生故人大馮君約之不來歲聿暮  
歲聿暮君何之側聞他日撫州去又恐促駕江東歸梅  
花千樹化為雪寄贈惟有長相思

張以寧

分題蕪城煙雨送吳原哲教諭

蕪城路年去年來自煙雨冉冉春濃濕蕪絲濛濛曉暗

迷鶯樹鮑昭愁絕未歸來為畫當時斷腸賦登高悵望  
正思君帆影微茫又東去

題日本僧雲山千里圖

天東日出天西入萬里龍鱗散原隰日東之僧度海來  
袖裏江山雲氣濕願乘雲氣朝帝鄉大千世界觀毫芒  
却騎黃鵠過三島別後扶桑枝葉老

夜飲醉歸贈王伯純是日王得容程子初同飲  
歲云暮矣客不樂青雨亭前翫孤鶴城頭悵悵雲下垂

竹外騷騷雪微作亭中王郎風格奇愛竹愛雪仍愛詩  
開尊酒好客更好坐中王程俱白眉紅爐照閣生春霧  
詩思騰騰天外去玉姬舞倦迴風來吹倒三山見瓊樹  
馬蹄蹴響客歸時留我更盡金屈卮塵空祇覺乾坤白  
飲醉那知賓主誰坐聞一聲兩聲折攜燈起看竹上雪  
瑤華翠色森陸離人影燈光兩清絕却歸覓紙醉自題  
烏啼古寺風淒淒明年此夜知何處興發還應訪剡溪

題李白問月圖

誰提明月天上懸九州蕩蕩清無煙天東天西走不駐  
姮娥鬢霜垂兩肩中有桂樹萬里長吳剛玉斧聲聞聞  
顧兔杵藥宵不眠天翁下視為爾憐頗聞昔時錦袍客  
乃是月中之謫仙帝命和予羽衣曲虹橋一斷心茫然  
竹王祠前霧如雨躑躅花開啼杜鵑月在天上缺復圓  
人間塵土多英賢舉杯問月月不言風吹海水秋無邊  
滄波盡捲金尊裏清影長隨舞袖前相期迢迢在雲漢  
嗚呼此意誰能傳

王伯純讀書別墅晨起有懷縱筆奉寄

數日有所思作詩無好趣思君讀書芳桂林睡起題詩  
有新句謝公埭上棟花風密葉啼鶯綠如霧君如塵外  
鶴我似書中蠹人生知己海內稀縱有參差不相遇尺  
尺思君知幾回遠別懸知亦良苦草亭新竹長昨夜邗  
溝雨思君持酒時心逐江潮去明年柳暗金河路君馬  
如龍轡如組而今壁上好題詩記取王郎讀書處

題進士卜友曾瘦馬圖

卜侯喜我詩袖出瘦馬圖前有杜陵瘦馬行令我閣筆  
久嗟吁憶昔馬齒未長日金羈蹀躞鳴天衢逐景虞泉  
日未晡羲和頓轡喘不蘇石根一蹶亦常事誰遣逸足  
輕夷途霜風大澤百草枯飲齏不飽長毛踈相者舉肥  
汝苦瘠委棄乃在城東隅病顙有時磨古樹翻蹄無力  
袞平蕪當年笑殺紫燕愚中路清涕流鹽車嗟哉此馬  
世罕有駕駘多肉空敷腴骨格稜層神觀在頗類山澤  
之仙癯解劍贖汝歸伯樂今豈無浴之萬里流秣以百

東芻苜蓿花白春雲鋪氣全或比新生駒持之西獻穆  
天子尚與八駿爭先驅瑤池雲氣浮太虛日出積雪青  
禽呼長望臨風心鬱紆

題馬致遠清溪曉渡圖

今晨高卧不出戶歲晏黃塵九達霧美人遠別索題詩  
眼明見此清溪之曉渡溪傍秀林昨夜雨落花一寸無  
行路歌闌桃葉人斷腸艇子招招過溪去紅日青霞半  
晦明白雲碧嶂相吞吐詩成君別我亦歸此景宛是經

行處我呼九曲峰前船君帆正渡瀟湘渚雁去冥冥紅  
葉天猿啼歷歷青楓樹是時美人不相見我思美人美  
無度美人之材濟時具我老但有滄洲趣他日開圖思  
我時溪上春深采芳杜

林志尹秋江漁父圖

江風搖柳雲冥冥小艚釣歸潮滿汀賣魚得錢共秋酌  
白酒船頭青瓦瓶樵青勸酒漁童舞擊甌唱歌無曲譜  
船前野鴨莫驚飛我有竹弓不射汝



題蘇昌齡畫

徐君遠從西方來親為蘇子作松石松三千年鐵作膚  
石亦蒼寒太古色幾株老木相因依氣格不敢與之敵  
洲前摇摇者舟子短棹蒼江蕩晴碧著子歎歌於其中  
仰觀青天岸白幘是時東山月始出無邊露氣連赤壁  
潛蛟出舞巢鵲翔江姬色動三太息眼中之人有太白  
風雲變態俱無跡前輩風流今復聞人間絕景豈易得  
徐君更為添野夫共泛靈槎臥吹笛

題徐君美山水圖

天雲慘淡江欲雨古木陰森精靈語春潮夜落富陽江  
短篷晚繫蒼厓樹篷間文人清隱者傲視滄浪吟太古  
蜚人捉魚貫楊柳沽酒欲歸沙店暮掀髯以手招其來  
劃起沙汀數行鷺鷥飛不盡青天長漁舟散入蘆花霧  
遠山近山無數青我恐斯人有新句酒船獨載西家施  
玉手冰盤行雪縷酒酣竹弓抨野鴨笑調吳兒短蓑舞  
開圖興發思賦歸山水東南美無度

題楊子文羅漢渡海圖

天台之東巨瀛海濛濛元氣浮無邊應真十六山中來  
徑渡萬里蛟鼉淵巨靈前驅海若伏翠水帖帖開紅蓮  
神螭猛獸競軒翥穹龜巨魚相後先一山浮玉當其前  
石室古蘚垂千年異人高居役衆鬼挽過巨浸如飈旋  
貝宮神君迎且拜明星玉女爭花妍陰風黯淡百怪集  
夫容旂影飛翩翩石橋迴望渺何處紫翠明滅空雲煙  
問渠飛錫何所往母乃驚嶺朝金仙金仙雪山方宴坐

笑汝狡獪何紛然書生平生未省見太息此畫人間傳  
清時麟鳳在郊野白日杲杲行青天

題饒良卿所藏界畫黃樓圖

饒君手持新畫圖起摩雙眼驚老夫高林葉響畫浙瀝  
平皋野色春模糊綺疏繡瓦細毫末雕拱朱甍盤鬱紆  
樓前磊落三長身幅巾大帶皆文儒我疑岳陽或黃鶴  
此外風景江南無君云乃是徐州之黃樓令我悵然思  
大蘇洪河西來厚地裂蛟鰐抃舞號天吳飛樓雄壓城

之隅萬馬肅肅東南趨是州項氏昔所都綠棺金鏃埋  
平蕪瀝肝作書上明主遠略翻見英雄粗相攜一笑視  
千古恐是昨者黃陳徒細看古意在絹素稍覺爽氣浮  
睂須千年融結豈易得峨眉草木今猶枯當時漂流江  
海遍終古志士長嗟吁君到樓中若把酒明月正在青  
天孤

長江萬里圖為同年汪華玉賦

鄮州太守吾同年香凝畫戟春風前談詩虛幌生白晝

忽見浩蕩萬里之江天天開地闢鴻濛外風迴日動神  
靈會蓉旂翠節下歲蕤陰火明珠出光怪西山雪水青  
霄來豁然峽斷長川開洞庭浪闊秋蕩漾漢陽樹遠雲  
徘徊廬阜迢遙到牛渚復渚重洲散平楚布帆漠漠瓜  
步煙紅葉離離石城雨山菴似聽疎鐘鳴野橋疑有行  
人行村虛微茫灌木暗絕境毫末俱分明旅榜前頭更  
漁艇萬鷺千鴉動寒影水窮霞盡已欲無猶是海門秋  
萬頃野人興發滄洲間欲呼艇子吾東還熟看乃是雲

巢畫巧集人力迴天慳太守邀我題小草上有仙人虞  
閣老開圖歡喜悲忽來令我有句不能道仙人昔欲三  
神遊我居三神海上頭成連攜我鼓琴處白浪如山龍  
出遊夜夢從之看浴日十洲青小洪波赤仙人教讀新  
宮銘酒醒扶桑露華白小山桂樹淮之洲雁影幾度空  
江秋嗚呼仙人不可見太守與我心悠悠

閩關水吟

閩關之水來隴頭排山下與閩溪流閩溪送客東南走

直到嵩溪始分手客居溪上雲幾重烏啼月出門前松  
天風吹雲數千里飄飄直到長江水清淮浩蕩連黃河  
碧樹滿地黃雲多夢中長記關山路隴水潺湲似人語  
覺來有書不得將海潮不上嵩溪陽平原春晚生芳草  
杜鵑聲裏令人老行人歸來動十年潺湲隴水聲依然  
安得湘弦寫嗚咽彈作相思寄明月

予別黃巖十又六年謗焉德薄父老當不復記  
然區區常往來於懷也如海上人來見語疊疊



不能休別又依依不忍釋予不知何也賦此以贈

朗公相見廣陵春自云家世黃山人老夫疇昔黃山客  
江海見之情轉親坡陀石上曾波雪遍海蓮峯白於月  
新詩句句鬪清妍高誦長風動踈樾清晨言別索題詩  
我衰詩減黃山時春潮日夕海門去歸報山中耆舊知

全思誠

題趙魏公秋林曉行畫卷

王孫愛畫心獨苦下筆天機妙今古涼風蕭蕭涼日落  
蹇驢載我出林莽黃葉打頭秋滿身青山對面如故人  
不須覓句灞橋雪何用旅食京華春憶昔玉堂供奉日  
一二詞臣同夜直青綾被冷露華濃金蓮燭殘河漢沒  
雞栖樹底聲喔喔鶴立螭坳望珠箔鳬鷺散亂不成雙  
歸老林泉有餘樂臨風掩卷老淚落此畫此人那可作

送王元章北遊

我從越中歸山水猶在眼賀湖天寒水鑑淨禹穴木落

雲氣暖夢中往往復登臨萬壑千巖恣蕭散故人山水  
窟中來題詩直上姑蘇臺酒酣目力隘宇宙少年筆陣  
排風雷謝公屐齒小吳越北望中原更奇絕終南太華  
青未了桑乾之陰多積雪送君出門歌遠遊自笑把鋤  
空飯牛功成歸來尚黑頭訪子却覓山陰舟

鮑恂

題吳仲圭平遠圖

蒼山遙遙幾千里綠樹參差碧煙起雙帆忽從江上歸

影落斜陽濕秋水林陰蒼莽鳥不飛石徑蹭蹬行人稀  
松根似可縛茅屋沙尾亦足容漁磯我嘗西遊倚江閣  
極目長空入寥廓好山不肯過江來恨不乘風跨黃鶴  
吳君畫手當代無落筆何年成此圖安能著我巖壑底  
相覓老樵尋釣徒

詹同

題善原道韓幹黑馬圖

善家堂上書滿厨古今名畫頻卷舒我來一見韓幹筆

龍精自與凡馬殊  
玄鬣披披首渴烏  
紫瞳皎皎雙明珠  
黑雲一片忽墜地  
房星半夜飛神都  
御溝流水柳千樹  
圉人騎出拂春露  
黃金腰帶素花衣  
馬上回頭看飛絮  
絲韁在手不敢縱  
追風恐過龍樓去  
君不見向來畫馬  
只畫肉神逸之氣  
多不足幹遺真蹟  
世所稀使我見此  
思天育善家兄弟  
一馬驄此馬真與  
麒麟同白璧玉斗  
亦不換早晚持獻  
明光宮

送德安張用周遊廬山

匡廬山高雲氣多老木如石盤紫蘿松橋流水度金澗  
我昔結屋山之阿桑落洲邊種柑橘蓮花峯下尋芝朮  
仙宮臺榭作比鄰每欲相從候丹術寄詩畫喚白猿來  
巡杏夜驅玄虎出飛仙別去今幾年海上不見回樓船  
思之夢繞瀑布水玉琴為奏冰絲絃張君多古學才器  
何卓犖紛紛文狸赤豹間五色麒麟生一角朝辭白兆  
山暮過黃鶴樓去觀五老峯翠色連天浮醉揮綠玉杯  
笑贈珊瑚鉤商婦亭前歌窈窕灌嬰井上嘶驂騑讀書

白鹿之洞裏寫字洗墨之池頭  
匡廬清泉消百憂我所樂處  
君當遊霓旌羽駕在丘壑  
相逢往往皆仙流與君  
大藥駐光景人間回首三千秋

題松鶴蔡先生家藏李伯時西嶽降靈圖

前二人騎

行後三人徒步狀若馳獵者其最後則有雲氣  
神人居中嗟夫禹鼎象姦齊諧誌怪世或有之  
但恨無胥臣之多聞子產之博物歷覽載籍  
未遑夷考模寫畫像為作短篇以俟知者

龍眠居士畫入神展畫冥搜畫中意  
白日杲杲人出畋  
長風蕭蕭雲拂地前有一匹雪色駢  
次有一匹玄花驄

兩人冠服何其雄若非將相應王公繁纓寶鞍金匱匣  
各持羽箭懸雕弓後有三人總徒步蒼鷹黃犬行相從  
雲間歛見光燦爛玉輅瑤輿下霄漢不駕紫鳳白麒麟  
海犀天駟多奇玩鸞旌虎節旋低昂星仗霞幢互繚亂  
無乃朝辭太華峰得非曉過雲臺觀輦中坐者真天人  
晃珠龍袞儼昭煥金童玉女續往來慶雲為馭天為階  
長眉刷翠面如月知有道骨無塵埃令人可望不可及  
恍惚雲中相出入衣霑玉井碧蓮香旗翻仙掌露華濕



我識泰山封禪書不識此畫當何如人言西嶽降靈圖  
西嶽或有人間無

松澗亭

澗上長松一百尺松花落澗流香雪仙韶入夜度晴空  
飛瀑隨風灑秋月高人於此構小亭上有雲氣山青青  
昨日客來覓琥珀旋汲清泉煮茯苓

送蔚教授歸襄陽分題得解珮渚

襄陽城外西南阿秋風江渚生白波渚宮神女老龍子


手把瑤華雙踏歌雙踏歌醉晴日嬌比春花紅欲滴紫  
綃衣袂青霞裳綠髻如雲高一尺珮環解下明月珠五  
色虹光照秋碧鄭生所遇天下奇樂莫樂兮初相知桑  
田滄海幾更變天上人間多別離蔚君家在襄陽住皎  
皎清標類交甫攜琴合向萬山中莫作書堂近江渚向  
來神女亦化龍時復尋珠起風雨

訪弟長沙霍元瞻雪夜為作秋山圖

我愛霍元瞻清標如玉雪蒼松立石崖白鶴鳴海月瘦

馬衝寒冰在鬚日暮去訪元瞻居高堂中夜燒長燭為  
我寫出秋山圖墨池水凍筆如槩使我見之喜且愕雲  
氣忽從衡嶽來雨聲似向瀟湘落二客蘭舟泊遠沙一  
箇茅亭在陰壑感君厚意不可量我欲酬爾明珠璫賈  
傅祠前相別去挂在鵲山青草堂

御選明詩卷三十六



總校官庶吉士臣侍朝

校對官檢討臣蕭九成

謄錄舉人臣傅瓌芳

欽定四庫全書薈要

集部

御選明詩卷三十七

詳校官原任主事臣李斯咏

欽定四庫全書薈要卷一萬八千五百三十七

集部

御選明詩卷三十七

七言古詩二

宋訥

吳興唐子華畫雲山小景圖

君不見夏珪昔寫漁邨春霧時江山半入無聲詩又不  
見馬麟昔作關山秋色圖千里風煙來座隅夏珪馬麟  
去已遠一入九原呼不返只今畫者亂如麻吳興近數



唐子華子華非夏亦非馬得意雲山自揮灑一幅生綃  
不滿尺平遠高深生筆下恍如坐我武夷山主人見客  
開柴關幽蹊曲徑歸路迷白雲引出青松間又如坐我  
瀟湘側渙子艤舟來迓客水邊籬落自成村佇望九疑  
江樹隔隔岸人家茅蓋亭過橋二老指山青飛泉絡層  
石古木挂寒藤晴窗忽看不似畫霏丹凝翠疑天生相  
對融心神頓覺塵夢醒疎懶胸中有丘壑得此珍藏作  
清樂平生寓意不留意一朝笑贈芙蓉幙芙蓉幙底風



流賓高堂挂壁無紅塵公餘把酒自怡悅便是雲山圖上人

袁凱

夜歸

黑風漫天天雨汁海水蕩滴如山立沙頭舊屋四角崩  
草茅無人不收拾此時歸來夜將半短衣無綿滿身濕  
西隣燈火喚不應飯冷欲食何由食

觀朱澤民所畫山水有感

朱公畫圖愛者衆聲價端如古人重王卿鉅公數見尋  
往往閉門稱腕痛我時挾冊遊郡城朱公愛我詩律精  
時時沽酒留我宿共聽西窗風雨聲清晨起來忘洗盥  
短衣飄蕭臨几案太行中條眼底生巖岫冥冥氣淩亂  
禹鑿龍門疏洛水根入黃河源不斷南及衡陽抵桂林  
東入會稽連海岸是中寘我一畝宮正如浮萍在江漢  
溪流浣浣石齒齒夾岸桃花逴遠邇原頭煙霧散雞犬  
屋裏詩書雜童稚扁舟遠來知是誰豈是昔日鴟夷皮

五湖鰕菜殊可樂千古功名何足奇只今四十有三載  
公竟不歸畫圖在世間好手豈易得終日紛紛勞五彩  
感時念舊心獨苦况我頭顱白如許呼兒捲却不忍看  
白髮高堂淚如雨

王若水為畫秋江衆禽圖

錢塘王宰心思長欲與造化爭毫芒下筆百鳥相趨蹌  
前身豈是孤鳳凰江頭芙蓉花正開花下細浪亦縈迴  
駕鵝貼貼天際來雄雌相隨氣和諧一雙鴛鴦睡沙尾

野鳬翩翩唼菰米羣鷗爭浴故未已傾落枯荷葉中水  
鵲鵲飛飛多急難睢鳩意度誠幽閑乃知良工有深意  
不在丹青形似間姑蘇臺前秋氣孤五羊城下烟疎疎  
此時此景真相似獨少扁舟歸釣魚宰也只今成老夫  
愛我不辭為此圖我今親老無可養慎勿重添反哺烏

送曹生從師

白沙入泥沙自黑蓬生麻中豈不直生子當置鄒魯間  
禮義薰陶易成德三江雪花沒馬牛曹生扣門言遠遊

天地苦寒子何往負笈從師清泖頭魯君為儒我所知  
規矩進退無差池座中弟子十餘輩森森玉立多容儀  
子往拜之聽教誨師嚴友親各從類一簣為山古所聞  
百川與海終相會他時還鄉拜庭闈百年門戶頓光輝  
里中父老皆稱歎勝似蘇家相國歸

大醉後率爾

身是江南儒家子十五學經二十史低回欲得聖賢心  
浩蕩更覓先儒旨當時自謂才可重豈料中年人不用

白頭縱得溪上田手脚生疎不能種

江上送高文起夫分韻得暮字

青春送客黃家渡千里汀洲帶芳樹煙中歷歷白鳥來  
日晏翩翩綵舟去主人置酒江上屋遠客哦詩水邊路  
明朝花落更思君海東月上青山暮

王叔明畫雲山圖

有客來自高句麗遺我一幅丈二紙纖白只如松頂雲  
光明不減吳江水藏之篋笥今七年妻孥愛惜如紈綺

至正乙巳三月初王郎遠來訪老夫升堂飲茶禮未畢  
索紙為畫雲山圖初為亂石勢已大橐駝連拳馬牛卧  
忽焉拔地高入天欲墮不墮令人怕其陽倒掛扶桑日  
其陰積雪深千尺日射陰崖雪欲消百谷春濤怒相激  
林下丈人心自閒被服如在商周間問之不言喚不返  
源花漠漠愁人顏老夫見之重歎息何由致我共絕壁  
王郎王郎莫愛惜我買私酒潤君筆

徐子脩畫山水

夏家高堂生畫寒徐卿畫圖墨未乾  
深山大澤貯煙霧黑處似有龍蛇蟠  
襄陽小米師董原妙處不受繩墨牽  
頃刻萬里皆自然房山尚書世稱賢  
化為白雲滿晴巔李家將軍極清妍  
畏避退縮不敢前至今海內人爭傳  
卿惟得此二家意損益往往無凝滯  
意思元居造化先筆力正在蒼茫際  
前年為客寫林麓百道飛泉出幽谷  
老夫醉來不敢眠深慮波濤捲茅屋  
長隄曲坂路如線遠入深林時隱見  
水上人家不閉門門外幽花滿芳甸



徐卿徐卿我所慕廿載相看髮垂素安得瀟湘千尺水  
更畫城東種瓜處

高啓

中秋翫月張校理宅得南字

八月望夜天如藍海色卷霧山收嵐玉盤元沉龍窟底  
忽起萬丈誰能探初來空中光尚濕霜娥寒鬢風鬢鬢  
人言一年此最好金精水氣秋相涵小星盡去大星在  
芒角欲唾敢與參天將洗眼照下土啖食肯縱妖蟆貪

穿深窺暗不遺隙魍魎忌影逃巖嵌前年客中憶見之  
家人怨別方喃喃荒山不知佳節至垂首凭案尋書蟬  
但怪流輝入敗戶油燈失燄留孤龕起行陰林不用炬  
剝啄獨叩峯西菴虬蛇亂踏心膽悸怪影走石皆楓楠  
即呼道人共載酒放舟直下夫容潭翻翻驚鶻落樹杪  
吹笛正和鳥飛南今年在舍反寂寞暗室困卧如僵蠶  
乾愁無端負良夜月固不言我則慙人無賢愚競翫賞  
况我清景性所耽忽憶諸君隔河水持被就宿聆高談

為呼老婢掃庭宇一席盤飮梨與柑江城重閉萬家寂  
樓鼓近聽纔過三空堦淒其覺露泣虛牖窈窕疑烟含  
婆娑欲留月伴影素鸞西下煩停驂明宵復出已難似  
動別經歲嗟何堪尊前此月又此客世所難遇心應諳  
關山幾處未解兵擊柝不寐愁丁男南鄰歌舞北鄰哭  
月雖同照異苦甘何人為我揮天戈乾坤多難俱平戡  
行者得還居者樂清光所及恩皆覃懸知此願未易遂  
憂來舉盞從沉酣須臾衆散曉蟲急古桂吹落自毵毵

送王太守遷雲間

男屠豬羊女醜酒共禱神祠留太守太守今年遷大州  
除書已下誰能留兩州相去無百里失君應愁得君喜  
安得如君數十人一時盡福東南民

劉松年畫

樵青刺篙勝搖漿船頭分流水聲響青山渺渺波漾漾  
白鷗飛過時一兩載書百卷酒十壺日斜出遊女兒湖  
鄰舟買得巨口鱸醉拍銅斗歌嗚嗚此樂除却江南無

煮石山房為金華山人賦

山人不飯杭稻香笑指白石為餽糧金華之石猶可食  
元是舊牧初平羊荆榛拾歸夜深煮自言久服能輕舉  
但令隨處有雲根不問青天旱無雨我生無力耕西疇  
硯田欲枯抱飢憂便當從君學此術絕勝乞米監河侯

夜發錢清

錢清渡頭船夜開黃茅苦竹聞猿哀客官釃酒水神廟  
風雨滿江潮正來蒸飯炊魚坐蓬底不覺舟行兩山裏

擢歌早過越王城東方未白啼鴉起

獨遊雲巖寺寄周砥

城西諸山非不奇我遊獨與茲山宜紅櫻春開山後寺  
白水夏滿山前陂幽居況與山不遠鐘鼓每到空齋帷  
雨餘煙中落日下曳杖往讀頭陀碑兩崖蒼蒼日色古  
枇杷樹高陰滿池殿燈欲昏上羣鼠塔鈴已靜蹲孤鷗  
興來即遊興盡返迎送豈要山僧知困窮喪亂豈無感  
正賴此境忘吾悲嗟君何為乃自苦破屨短策塵中馳

挂帆能來亦未晚  
浦口三日南風吹

贈李外史

仙人飄飄若雲風  
來去倏忽誰能窮  
豈惟上界足官府  
往往亦在塵埃中  
我欲尋真向五岳  
亂後舊路迷榛蓬  
天雞未鳴夜谷暗  
海鶴已去秋壇空  
丹崖碧澗瑤草歇  
洞府一閤無由通  
陌頭驚逢李道士  
自說柱史為吾翁  
傍人相傳解起死  
袖裏有丹如日紅  
我聞安期古策士  
親見楚漢爭雌雄  
終然濁世不肯住  
渡海竟去先飛鴻

玄洲東望纔咫尺彩霞幻結金銀宮何當共赴食棗約  
三花醉折春濛濛迴看城郭煙霧杳大笑下士真沙蟲

方隱君山園

吳興城南山水勝竹樹參差萬家映幽深誰似隱君園  
車馬不來雞犬靜兩溪迴通柳港曲一峯立對柴門正  
東西別墅憐更好孤櫂往來隨晚興總令種菜不種桃  
新製長鑱木為柄家童頗解候天時鄰叟還能論地性  
交交林路翳復開活活野泉流不定清晨聞鳥欣獨往



濃綠潑晴畦色淨老葉垂根孤蚓號殘英綴梗羣蜂競  
乍紫新蔓喜籬長欲迸晚芽嫌土硬此時采擷自足飽  
肯為食肝煩縣令古來名園恣可數金谷辟疆誇獨盛  
鑿石圓開弄月池買花深作行春徑愛妾宵陪秉燭晏  
狎朋晝接流觴詠長年懽樂豈知極回首芳菲屬他姓  
只今誰解問遺蹤斷甃摧垣無一剩乃知厚業要德守  
那得衰榮但言命君能勤儉遺子孫應有佳名書郡乘  
江上晚過鄰塢看花因憶南園舊遊

去年看花在城郭今年看花向村落  
花開依舊自芳菲客思居然成寂寞  
亂後城南花已空廢園門鎖鳥聲中  
翻憐此地春風在映水穿籬發幾叢  
年時遊伴俱何處祇有閒蜂隨繞樹  
欲慰春愁無酒家殘香細雨空歸去

美人撲蝶圖

花枝揚揚蝶宛宛風多力薄飛難遠  
美人一見空傷情舞衣春來繡不成  
乍過簾前尋不見却入深叢避鶯燕  
一雙撲得和花落金粉香痕滿羅扇  
笑看獨向園中歸

東家西家休亂飛

與客飲西園花下

一壺酒正滿一樹花仍新  
傾壺對花樹日暮西園春  
不愛枝上花愛此花下人  
相逢莫學花無賴明日分飛隨路塵

贈醉樵

川釣已遭獵野耕終改圖  
不如山中樵醉卧誰得呼  
采山不采松松花可為酒  
酒熟誰共斟木客為我友  
木客

已去空石牀舉杯向月邀吳剛借汝快斧斫大桂要令  
四海增清光林風吹髮寒擁耳獨枕空尊碧巖裏此時  
忘却負薪歸猛虎一聲驚不起世間萬事如浮煙看棋  
何必逢神仙青松化石鶴未返酒醒又是三千年

送劉將軍

朔風吹沙復吹雪笑解吳鉤初欲別酒酣擊筑和悲歌  
將軍出關車騎多

初入京寓天界西閣對辛夷花懷徐七記室

去年寺裏開辛夷君來憶我曾題詩今年我來君已去  
思君還對花開時欲尋花下君行迹日暮空庭古苔碧  
殷勤把酒問花枝看過春風幾行客

題美人對鏡圖

曉院鹿盧鳴露井美人夢斷梨雲冷起開妝閣笑窺奩  
月裏分明見娥影自對猶憐況主家春風一面惱腸花  
何由鑄入青銅內不遣秋霜換蛾翠

北山觀猿

黑衣公子何婀娜飛挂枯梢不愁隨幾迴呼下白雲間  
拋賜曾嘗內園果家鄉何處是巴西回首煙蘿望欲迷  
料得孤舟江上客月明少聽一聲啼

客舍雨中聽江卿吹簫

客中久不聞絲竹此夕逢君吹紫玉斷猿哀鴈總驚啼  
我亦無端淚相續數聲嫋嫋復嗚嗚散入寒雲細欲無  
愁望洞庭空落木夢遊秦苑總荒蕪曲中只訴君心苦  
不道人聽更悽楚關山燈下歎羈臣江浦舟中泣嫠婦

憶昨閭門費酒貲，玉人邀坐弄參差。  
彩霞深院花開處，明月高樓鶴去時。  
如今忽在他鄉外，風雨寒窗兩憔悴。  
恨無百斛金陵春，同上鳳凰臺上醉。  
始知嶰谷枯篁枝，中有人間無限悲。  
願君袖歸掛高壁，莫更相逢容易吹。

夏珪風雪歸莊圖

江雲粘波晚糝糊，青山忽失如亡逋。  
乾坤瑩淨水作壺，春意散入千林枯。  
野橋古渡行人無，清響瑟瑟索鳴殘蘆。  
江天萬里一老夫，短蓑如蟻舟如鳧。  
魚寒入泥不上眾。

歸來遠識漁村孤柴門夜叩聞犬呼逕竹壓折誰相扶  
山妻自炊稚子沽不羨炙肉圍紅爐嗟余客遊歲屢徂  
詩囊隨驢走髯奴長安何處覓酒徒飛花撲頭帽不烏  
旅舍無夢還江湖慙對風雪歸莊圖

贈金華隱者

我聞名山洞府三十六一一靈蹤紀真錄金華秀出向  
東南遠勝陽明與句曲樓臺縹緲開煙霞天帝賜與神  
仙家靈源有路不可入但見幾片流出雲中花子房之



師赤松子三千年前亦居此飛行恍惚誰解尋漫說至今猶不死松花酒熟何處遊瑤草自綠春巖幽羣羊卧地散如石老鹿耕田馴似牛聞有隱君子乃是學仙者自從入山中不曾到山下世人莫知其姓名以山呼之不敢輕樵夫忽見苦未識只疑便是黃初平嗟我何為在塵網遠望高峯若天壤茯苓夜煮倘許餐鐵杖來敲石門響

題朱氏梅雪軒

石城山居梅萬塢冒雪曾來叩僧戶爛然如見會羣妃  
白鳳繽紛下瑤圃數片輕吹著鬢華乍看似雪又疑花  
迷魂亂眼春如海那辨南枝映竹斜獨披鶴氅穿林去  
凍壓寒梢應幾樹聽響方知夜灑時聞香始識繁開處  
回首春風憶舊遊夢尋歸路隔羅浮年來驢背無詩思  
醉踏塵埃空自愁聞道君家溪上下玉蕊瓊英巧相亞  
履跡誰來東郭朝笛聲不起南樓夜翠羽驚啼莫怨猜  
破寒宜共一樽開雪晴花發須相記我亦扁舟乘興來

宿蔡村夜起

四更雞叫七星爛獨起開門候天旦月掛愁邊人影低  
風驚夢裡烏羣散孤舟嫠婦寒自泣破屋老農貧屢歎  
早餐欲發未遑安客路飄零正多難

菜邁為余唐卿賦

柱桐里中君始歸菜花滿園黃蜂飛桔槔依樹長不用  
江南雨多山土肥方畦獨遶看新綠晚食何須尚思肉  
翠縷登盤春薤香金釵出盎冬菹熟我家亦在萰菰鄉

秋風便應歸共嘗潮州司馬成何事回首空愁足萬羊

鷗捕魚

秋江水冷無人渡羣鷗忍飢愁日暮白頭來往似漁翁  
心思捕魚江水中眼明見魚深出水復恐魚驚隱蘆葦  
須臾銜得上平沙鱗鬣半吞猶見尾江魚食盡身不肥  
平生求飽苦多飢却猜人少忌機者江上相逢不飛下

題朱澤民荆南舊業圖

睢陽醉磨一斗墨夢落荆南寫秋色大陰垂雨尚淋漓

哀壑回風更蕭瑟楓林思入煙霧清湖水愁翻浪波白  
溪上初逢野老航山中遠見先生宅秫田半頃連茅區  
茅屋三間倚蘿薜僧來看竹乘小輿客去尋岑借高屐  
任公臺下石可坐周侯廟前路曾識虎跡時留暮臺紫  
蛟氣或化秋雲黑城郭當年別已久風塵此日歸不得  
落日書齋半壁明圖畫卧對空相憶

次韻荅朱冠軍遊西城之作

前年城西作冶遊柳條拂蓋花迷舟笑看明月問狂客

我舉大白君當浮去年城西復偶住酒伴家家邀即去  
東鄰寺裏花正開半醉半醒遊幾度今年有花愁獨尋  
閉門三月卧春陰將軍小隊遊何處日暮空聽車馬音  
皋橋泰娘殊窈窕為我喚來歌水調客愁草草不易除  
世事茫茫本難料玉壺一雙秋露傾惟此可以忘吾情  
醉歸共射草中石笑劈弓絃霹靂鳴

京師苦寒

北風怒發浮雲昏積陰慘慘愁乾坤龍蛇蟄泥獸入穴

怪石凍裂生皴紋臨滄觀下飛雪滿橫江渡口驚濤奔  
空山萬木盡立死未覺陽氣回深根茅簷老父坐無褐  
舉首但望開晴暎苦寒如此豈宜客嗟我歲晚飄羈魂  
尋常在舍信可樂牀頭每有松醪存山中炭賤地爐煖  
兒女環坐忘卑尊鳥飛欲斷况無友十日不敢開衡門  
竭來京師每晨出強逐車馬朝天閣歸時顏色黯如土  
破屋暝作飢鳶蹲陌頭酒價雖苦貴一斗三百誰能論  
急呼取醉竟高卧布被絮薄終難溫却思健兒戍西北

千里積雪連崑崙河冰踏碎馬蹄熱夜斫堅壘收羌渾  
書生只解弄口頰無力可報朝廷恩不如早上乞身疏  
一蓑歸釣江南村

望月臺

臺前夜半烏啼時起望明月彈商絲月來照見臺上影  
松桂滿山風露冷

釣雪灘

江流欲漸魚不起一蓑猶釣寒蘆裏漁村茫茫煙火微



雪滿晚蓬人獨歸

晚步西郊見駕鵝羣飛

平煙漠漠天蒼蒼牛羊不牧野草黃  
鴛鴦東來高作行晴空忽墮數點霜  
紫塞碧海遙相望下視鳬鴨愁陂塘  
書生見此心欲狂便思呼鵝上馬馳  
鵬鸞之表自倒披箭聲脫絃鳴餓鴟  
遠翻正落雙參差仰空拍手誇絕奇  
豪氣服殺并州兒也勝閉門坐詠詩

贈鍊師禱雨

白頭道士騎一鶴手把青蓮下寥廓人間又見海田枯  
十丈黃塵沒城郭昔年服事茅長君能役鬼神呼風雲  
下為羣生埽旱沴雨工驅起如羊羣陰雷填填天欲怒  
靈飈吹旗紫壇暮書入重關虎豹開壁沉古井蛟龍護  
須臾甘澍何滂沱十日不雨應無禾祠官空為大雩舞  
覲女羞作迎神歌明朝師歸定何許雲裏懸珠火如黍  
更煩夜起把天瓢翻作東南洗兵雨

題黃大癡天池石壁圖

黃大癡滑稽玩世人不知疑似阿母傍再謫偷桃兒平  
生好飲復好畫醉後灑墨秋淋漓嘗為弟子李少翁貌  
得華山絕頂之天池乃知別有縮地術坐移勝景來書  
帷身騎黃鵠去來遠縞素飄落流塵緇潁川公子欣得  
之手持示我請賦詩我聞此中可度難玉枕秘記傳自  
青牛師池生碧蓮花千葉光陸離服食可騰化遊空駕  
雲螭奈何靈跡久悶藏荒竹滿野啼猩猩尋真羽客不  
肯一相顧却借釋子營茅茨我昔來遊早春時雪殘衆

壑銷寒姿磴滑不敢騎馬上青鞋自策桃筇枝上有煙  
蘿披拂之翠壁下有沙石蕩漾之清漪晴天倒影落明  
鏡正似玉女曉沐高鬟垂飲猿忽下藤裊裊浴鶴乍立  
風淅淅匡廬有池我未到未省與此誰當奇埽石坐其  
涯沿洄引流卮醉來自照影俯笑知為誰落梅撲香滿  
接蘿暮出東澗鐘鳴遲歸來城郭中復受塵土欺十年  
勝賞難再得恍若清夢一斷無由追朝來觀此圖惻愴  
使我悲當時同游已少在我今未老形先疲人生擾擾

嗟何為不達但為高人嗤漢南已老司馬樹峴首已仆  
羊公碑惟應學道悟真訣不與陵谷同遷移仙巖洞府  
孰最好東有地府西峨嵋高崖鐵鎖不可攀援以逕上  
仰望白雲樓觀空峩巍此山易上何乃遺便與猿鶴秋  
相欺欲借太乙舟夜卧浩蕩隨風吹洞簫呼起千古月  
照我白髮涼絲絲傾玉醪薦瑤芝招君來遊慎勿辭無  
為漫對圖畫日夕遙相思

聖姑廟

在洞庭鼇頭山晉王彪女得道或云  
姓李氏祈禱者不誠則風迴其舟

湖心涌出黿頭山白波翠島非人寰清虛宜作水仙府  
鱗堂荷屋居其間淵都羣靈誰為主煙鬚脩然一神女  
柔姿誰敢狎相親笑叱鼉龍起雷雨玉骨蟬輕蛻幾秋  
世緣已斷靜無愁采蘭每約湘濱會拾翠時陪漢上遊  
水禽翔鳥衛芝蓋長在蒼茫杳冥外鮫人獻綃裁作衣  
螺女供珠綴為佩花落閒祠謝古春蓮幃瑤席掩香塵  
空山夜夜星河遠芳渚年年蘅杜新霞舒霧捲凝光彩  
笑語無聞復誰待冷風幾度引舟迴宛似蓬萊隔煙海

猿叫楓林魚躍波  
桂旗翻翠幕寒多  
女巫佇望飛帟度  
獨奏空侯引曼歌  
椒觴莫罷沉玄璧  
鳥沒遙天湛空碧  
遺情不結楚臺雲  
世人何處尋踪跡

### 洞庭山

在太湖中即包山舊無蛇虎雉三物有穴乃林屋洞天闔閭使靈威丈人入探

禹所藏治水符并不死方其中有銀房石室白芝紫泉又有兩圓石扣之則鳴謂神鉦云

朝登西巖望太湖  
青天在水飛雲孤  
洞庭縹緲兩峯出  
正似碧海浮方壺  
嘗聞此山古靈壤  
蛇虎絕跡歡樵夫  
濤聲半夜恐魂夢  
石氣五月寒肌膚  
居人彷彿武陵客

戶種橘柚收為租高風欲起沙鳥避明月未出霜猿呼  
中有林屋仙所都銀房石室開金鋪羅浮峨嵋互通達  
別有路往非人途天后每降龍垂胡神鉦忽響驚棲鶻  
自懸日月照洞內古木陰蔽空朝晡風吹白芝晚易老  
雲帶紫泉秋不枯靈威丈人亦仙徒深入探得函中符  
玄衣使者不暇惜欲使出拯蒼生蘇後來好事多繼往  
石壁篆刻猶堪摹千年玉鼠化蝙蝠下撲炬火如飛鳥  
玄關拒閉誰復到似怪衣上腥塵汙勿言神仙事恍惚



靈蹟具在良非誣我生擾擾胡為乎坐見白髮生頭顱  
久欲尋真未能去局束世故緣妻孥何當臨湖借漁艇  
拍浪徑渡先雙鳬獨攀幽險不用扶身佩五嶽真形圖  
夜登天壇埽落葉自取薪水供丹鑪此身願作仙家奴  
不知仙人肯許無狂語醉發應胡盧

楊基

清溪漁隱

清溪秋來水如練歷歷魚蝦皆可見綠蓑酒醒鴈初飛

風急蘆花吹滿面溪南一帶是青山逢著垂楊便可灣  
謾道白鷗閒似我漁舟更比白鷗閒

金陵對雪用蘓長公聚星堂禁體韻

黃雲凍凝不成葉十載江南無此雪朱簾十二曉開齊  
正值千山鳥飛絕牆腰簷角危欲墮竹頂松梢重將折  
偏來舞殿鬪輕盈忽上金釵易消滅誰家沉火吹笙坐  
著處銀鉶呵手掣脂凝香靨罷晨妝臉暈微渦散春纈  
帶雨欲拈仍作片因風誤觸俄成屑漁蓑向晚畫難工

歌樓未曉光盈瞥怪事休驚越犬吠豐年每信吳儂說  
欲和東坡白戰詩冰滿霜毫硯如鐵

喜客來

壯年不愁長作客亦不暇愁鬚雪白但愁金盡酒樽空  
辜負長安好春色閉門三日生綠苔失喜忽聞佳客來  
急拈春衣典春酒正值滿樹梨花開花如冰雪人如玉  
妙舞清歌懽不足黃昏客醉酒未醒細雨鶯啼梅子綠

送張教諭

鑑湖五月涼風起荷葉荷花香旒旒先生到縣花正開  
濯足船頭弄秋水聖朝復興文武科諸生習射更絃歌  
他年大比登髦俊應報新昌縣裏多

宜秋軒桂

軒東古桂一株花已爛漫人無知者偶夜聞香自  
東來旦起訪之得於荒庭廢苑中余既嘆其不為  
人所賞識而復嘉其不以無人而不香也繞樹嗟  
悼慰之以詩

宜秋軒東一株桂香葉婆娑擁寒翠秋堂夜靜風滿簾  
時覺幽芳來拂鼻清晨曳履訪幽獨一徑青苔雙戶閉  
離離嫩蕊罨蟲絲簌簌輕花落深砌麤金泣露濃更密  
苞粟凝珠疎復細半粒能含萬斛香一枝解奪千株麗  
當年此地競攀折月戶雲窗敞秋霽金樽灑泛綠色酒  
翠袖涼簪寶妝髻西風幾度人跡絕獨有幽花能點綴  
村荒地僻霜露繁摧折紅蘭凋紫蕙瞥然一見衆憂失  
不意孤懷得佳麗更深月出擬再來明日紛紛嗟滿簞

宜秋軒梅

萬松嶺上梅千樹踏雪年年看花去湖邊十里翠裙腰  
盡是看花醉眠處花今憔悴不如前人亦飄零二十年  
夢魂不到西湖上春色自繞南枝邊今年看花來杜曲  
一樹寒香照茅屋別是人間冰雪魂肌膚綽約清如玉  
雪更玲瓏玉更溫春風入頰淡無痕數聲殘角黃昏後  
獨自相看半掩門

省掖觀梅和宋草堂韻

玉肌瘦怯春風惱  
脣紅不褪香雲老  
綺窗人靜月初圓  
笑覺飛璫顏色槁  
羅幄銅餅小几邊  
銀燈踈影硯臺前  
一株初破休輕折  
半朶猶含最可憐  
宮妝近眼人爭愛  
却恐愁多零落快  
莫教纖手嗅東風  
誰畫生香與真態  
邀方貧外看花

金昌亭西萬株花  
胭脂玉雪爭紛拏  
春風攜酒看花去  
騎馬徑到山人家  
花深樹密無逕入  
下馬徘徊映花立  
紫萼風微翠袖香  
紅絲露重烏巾濕  
別來幾負看花期

客裏匆匆見一枝白下橋邊寒食後廣陵城外綠陰時  
今年花最逢春早準擬清樽對花倒人意方邀酒伴來  
花枝已向東風老花雖漸老仍堪折猶勝紛紛滿蹊雪  
且共芙蓉幙裏人坐看海棠枝上月

聞鄰船吹笛

江空月寒江露白何人船頭夜吹笛參差楚調轉吳音  
定是江南遠行客江南萬里不歸家笛裏分明說鬚華  
已分折殘堤上柳莫教吹落隴頭花



登岳陽樓望君山

洞庭無烟晚風定春水平鋪如練淨君山一點望中青  
湘女梳頭對明鏡鏡裏芙蓉夜不收水光山色兩悠悠  
直教流下春江去消得巴陵萬古愁

長江萬里圖

我家岷山更西住正見岷江發源處三巴春霽雪初消  
百折千回向東去江水東流萬里長人今漂泊尚他鄉  
煙波草色時牽恨風雨猿聲欲斷腸

珊瑚

黑翎紅嘴花間鳥映花一點珊瑚小當時如意擊東風  
萬語千言啼未了雕玉籠開出繡楹海棠庭院雨初晴  
美人按拍教鸚鵡學得霓裳四五聲

白鷗

棠梨花開滿山白白鷗飛來春一色黃鸝紫燕太匆忙  
不道花間有閒客却嫌香霧污春衣立向湘江映夕暉  
鷗鷺相逢莫相妬一雙還拂楚煙歸

鷓鴣

湘江兩岸無茅宇  
湘竹陰陰覆江渚  
春來未聽一聲鶯  
只有鷓鴣啼暮雨  
憐渠亦是他鄉客  
苦向人啼行不得  
縱教行得也消魂  
那箇行人不頭白

錦雞

暖風晴日融春晝  
閒看花陰雞唾綬  
綺縠都將綵羽妝  
紅絲不待金針繡  
疊疊胭脂縷縷金  
龍紋盤錯鳳紋深  
憑誰剪作鴛鴦帶  
雅稱佳人翡翠衿

送朱明善少府

昨城主簿冰雪骨天闊霜清見飛鵲家住西湖第一橋  
半生詩酒笙歌窟斜肩兒子總宜船九里松陰十里蓮  
松下看山船上宿小娃隨索買花錢鶯嬌蝶妬春如綺  
一夜東風變桃李回首梁園望故鄉咫尺吳山四千里  
吳山漸遠音書絕兩鬢青青未成雪烏帽朝辭鄭圃煙  
鹿車夜挽蘭臺雪上官不憚路道長豈問富庶并荒涼  
正須到縣招竄匿要使枳棘皆耕桑婦女養蠶男種麥

食有雞豚衣有帛兒童不識成丁勞父老能歌縣官德  
慚余亦是滎陽簿虎牢關下成皋路有酒誰澆紀信魂  
無人敢畫鴻溝渡鄭衛由來本懿親相思只隔大河津  
愁將艮嶽風前柳持贈山陽笛裏人

芋隱為句曲山人翟好問作

種桑百箔蠶種芋千匹布先生種芋不種桑布作衣裘  
復為袴桃花雨晴水滿塘烏紗白芋春風香野樵山葛  
不敢並越羅川錦爭輝光兒童漾紗婦紡織賣布得錢

還買帛黃綿大襖一冬溫  
白雪中單半襟窄今年芋好  
畝百觔堆場積圃長輪困牀頭  
白酒夜來熟殺雞煮鴨  
邀比鄰東家種桑青繞屋  
宮絹未輸空杼柚婦姑相對  
歎無衣先生飯飽方捫腹

舟抵南康望廬山

春山如春草春來無不好  
況是香爐峯百疊屏風圍五  
老嚶嚶歷歷谷鳥哀朱朱粉粉  
山花開芙蓉削出紫霧  
上瀑布倒瀉青天來船頭春山  
重回首世上虛名一杯

酒李白雄豪妙絕詩同與徐凝傳不朽明日移舟過洞庭  
庭蘭花斑竹遶沙汀摩挲老子雙愁眼細看君山一點  
青

小孤山圖

徐賁畫代  
莘野賦

江流西來如箭急小姑橫截江心立桃花水漲勢相爭  
峽口瞿塘猶不及山神堂堂心膽麤當時人間偉丈夫  
江頭廟裏青綾帳翠靨金釵塑小姑

張羽

梁節婦

赤城曉擁青絲騎，玉鏡愁鸞落紅淚。  
冰魂偷逐水仙歸，綺樓一夜靈犀碎。  
六曲欄空不礙春，羅帶盤風輕颺塵。  
池波不動夜光碧，青天影落桃花雲。  
相思月照樓前水，離離芳樹流紅子。  
無情桃李亂中開，不學芙蓉抱霜死。

米元暉雲山圖

前代幾人畫山水，逸品只數南宮米。  
海嶽樓前北固山，頃刻雲煙生滿紙。  
古云丘壑起心胸，恍惚似與神靈通。



素壁高懸卧清晝耳邊恍若聞松風怪底青山起毫末  
森沉綠樹臨溪活仙人道士疑可招芝草琅玕俯堪掇  
千里能移方寸間天機揮灑過荆關如今畫史空無數  
對此高蹤詎敢攀

倪元鎮畫竹沈御史所藏

雲林之子有仙骨平生好潔如好色紛紛濁士等蟲沙  
嗚呼瓚也何由得憶昔常登清悶堂鵲尾爐爇龍涎香  
紹京妙墨僧繇畫示我不啻千明璫人間萬事如飛電

洗玉池空人不見  
季子城東土一抔  
何人為著黔婁傳  
繡衣使者騎青驄  
曾聽竹枝湘水東  
歸來見此若夢寐  
巴陵洞庭生眼中  
江湖豪翰今零落  
君得此圖良勿薄  
愧我題詩憶故人  
黃鶴何年下寥廓

錢舜舉溪岸圖

憶昔至元全盛日  
天子詔下徵遺逸  
吳興八俊皆奇才  
秀邸王孫稱第一  
一朝玉馬去朝周  
諸子聲名總輝赫  
豈知錢郎節獨苦  
老作畫師頭雪白  
江南沒骨傳者稀

錢也得法誇精奇  
晴窗點染弄顏色  
得錢沽酒不復疑  
今人祇知重花鳥  
豈識此圖奪天巧  
玄雲抱石雷雨垂  
蒼山夾水龍蛇遶  
岸側溪迴共杳冥  
蒲稗深沉映魚鳥  
漁舟乍隨遠煙散  
客子競渡澄江曉  
自云布置師北苑  
只恐庸工未深了  
卷餘更有魏公題  
字擬鍾王差未老  
鄭侯得之恐神授  
使我一見喜絕倒  
雙溪流水清何極  
城外南山空黛色  
文章翰墨何代無  
二子疇能躡其迹  
為君題詩三歎息  
於乎古人難再得

送沈孝廉讀書天屏山

秋空雨洗千芙蓉，霜樹遶谷攢青紅。  
嗟我欲游不可得，子往畢業茲山中。  
念子出身自紈綺，秀如青松茁蒿蓬。  
十年奔走鍛毛翮，黃金散盡家已空。  
懷中一經不敢棄，舍此將恐為昏聾。  
束書上堂告父母，雲深獨往無僕僮。  
林僧谷叟頗驚客，麤茶糲飯意甚忠。  
身閒晝靜百事絕，經史左右相研攻。  
逕須跨海踏鯨背，且莫瑣屑箋魚蟲。  
車良路端期不止，跬步自可升華嵩。  
學成靜俟時自至。

譬彼力穡遭年豐朝廷懸爵待奇雋掇取五鼎榮三公  
古來孝弟神所相未必使子羸其躬蹇予少學壯愈惰  
聰明日損鬢已翁世間有書未盡讀安得返老還為童  
跛鼈那由追騶耳贈子以策情何窮倘有新知遠相教  
為我緘寄東飛鴻

莘叔耕畫梅雪軒

好畫誰如莘棗強隋馬折肱猶未忘何年寫此寒林趣  
精絕未數左手王屋裏何人坐吹笛似是南昌郡中客

曲終朔雪忽飛來開門滿樹梅花白

韓介玉畫為童中州掌教題

我識河東老詞客鶴骨伶俜長八尺白頭徒步拾公卿  
人生變化誰能測將軍跋扈天為傾公持寸管力與爭  
當時直氣動朝野至今文采傳諸生諸生白面今已老  
三載儒冠空潦倒罷歸百事無所為萬壑千巖恣揮掃  
丹丘玄圃落眼前澗水松風鳴浩浩由來絕藝出天機  
肉眼紛紛爭醜好吳興博士今鄭虔故山未歸雪滿顛

今年召對席屢前蒙恩親賜水衡錢歸來見畫心茫然  
拄杖欲問金華船金華之洞小有天下與五岳相鉤連  
初平鍊丹去成仙弟兄聯袂風翩翩洞前白石如羊眠  
我欲訪之何由緣安得與子相周旋飢餐紫霞拾瑤草  
石上一笑三千年

陳仲美夏木圖

董元夏木不復見俗本紛紛何足觀陳郎筆力能扛鼎  
寫此千章生畫寒陰森似有神靈會偃蹇直作蛟螭蟠

天雞曉鳴清籟發木客夜度雲旂翻林下文人行杖藜  
石根葉落失舊蹊孤童襍被向誰宿山風蕭蕭日薄西  
商巖紫芝自可食武陵桃花原易迷人間瀕洞不可處  
莫畏虎嘯并猿啼

山泉隱居圖

日長侍立南薰殿聖主從容正開卷內臣如鵠擁圖書  
詔許近前曾一見玉躡金題照眼新三王二李迹未陳  
妙筆森芒洞冥漠乃知今人非古人歸來三歎北窗下



開屏見此新圖畫流淙百折掛石梁古木寒松勢相亞  
木末何人一草廬山泉之人昔所居鴻臚寺裏晚朝下  
對此高堂心鬱紆華亭柳湖眼中見武陵桃源路豈殊  
老夫曾住康王谷五老香爐映飛瀑亂來井臼今可存  
因爾高歌望黃鵠

徐賁

丙午中秋與余左司王山人高記室同過張文  
學宅看月

商飈吹秋天如藍出戶圓月生東南衆星次第歛芒角  
獨有桂影垂毳毳澄光無私照應徧不間污澤兼清潭  
冰輪軋軋上銀漢玉龍左右駕兩驂須臾當天蟾魄正  
八表洞視明相涵自憐下界苦迫塞未得變化同書蟬  
遙思海上看更好水氣顥顥雲無曇鮫人機室仰虛焰  
綃絲薄袖抽冰蠶孕珠老蚌躍波出吸納華采爭呀甜  
山河大地影倒入嗟此尺璧何由含曾聞月乃七寶合  
坳處修補須斤鑿又聞姮娥竊靈藥直欲不死真貪婪

如此怪事各有說理或有之幽莫探化橋擲杖本幻戲  
茲事何故推難諳分明以術誑人主不即加罪誠癡憨  
今宵貴家盛開宴奔走席上羅女男清弦脆筦樂正作  
金尊玉笋情方酣羈愁誰念獨居者家無隙地惟書龕  
南隣庭院未為廣較之我處殊差堪便攜濁酒扣門去  
肴核瑣細毋煩擔移床露坐共邀月更呼故友來清談  
諸君豪邁總名士長材落落皆梗枿詞鋒出硎賭快利  
鈍斧寧敢膺長鐔胸奇每能幹造化語峭似可欺巖嵌

我今結托豈偶爾內切自喜忘其慙當歌且用脫邊幅  
買酒奚問墮珥簪為君起舞明月下兩袖拂鬢風鬢髮  
佳節於人既不惡暢懷痛飲心所甘緣知樂景不易遇  
匪曰嗜好成淫耽此月一去又一載坐看直待雞號三

晚歸

樵風度溪波蕩影水葉圓圓綠浮荇白沙路遠雲花靜  
小艇爭先野鶴歸竹外依微衆山暝

瑤芳樓

高樓春多風日妍  
瑣窗瑤闌縈素烟  
水晶簾捲香散席  
瑤芳吹入琴中絃  
美人手度陽春曲  
水意山情斷還續  
三山鸞鶴夜飛來  
佩環搖曳玲瓏玉  
琴聲宛轉響春空  
滿樓白月梨花風

次韻楊孟載觀芍藥作

輕陰釀綠寒猶薄  
龜甲疏簾映朱閣  
美人偏有惜花心  
新水銀鉶送紅藥  
當階惟恐流塵污  
纖手籠春為花護  
一捻芳容飽弄嬌  
胭脂細結玲瓏露  
綵貼單屏襯碧綃

微風纔動見花搖香凝膩粉肌全濕影艷方諸臉半潮  
高枝開滿低枝捲翠檻移來隨步輦濃染如分織女機  
巧裁似出宮娥剪花情最重是何人應有鴛鴦帳裏身  
不用傳心題綺字踏歌當為喚真真

春陰應秦王令

雲花鱗鱗山漠漠重城平障芳陰薄膩雨輕吹飛復停  
勾引東風到簾幙草滋微濕沾芳塵隴頭不見尋花人  
桃英梅萼同懊惱水紋滿漲金河春柳絲暝濛煙不醒

轆轤暫輟銀鉗綆新鶯未換谷中聲  
遊蜂竟失闌前影  
丁香百結蕉有心綃屏六曲春沉沉  
香抽翠縷火長續  
餘寒撲錦籠朱琴江南春好多芳樹  
林園半是看花處  
明朝重整小紅車風光滿路行春去

楊孟載畫竹

江南看竹不為罕水郭山村長種滿  
東里千竿繞佛亭  
西鄰萬本連書館密葉分陰小閣深  
斜枝度影虛簾短  
蕭疎夜月翠羽涼搖曳南風鳥聲暖  
嗟余好竹處處遊

徑造豈減王猷誕湘江淇水無不到  
解谷柯亭亦嘗款  
人間音律性所好收作鸞笙與鳳管  
或裁文籥製小冠  
時尋新笋供清饌朝行竹下暮仍往  
自謂竹緣終不斷  
竭來并州苦寒地沙土撲面心煩懣  
寧無塞草共山花  
惟覺麤疎俗吾眼胸中塵氣久已積  
對此汾河詎能澣  
君心飽有渭川思揮灑風煙意閒散  
封圖遠送邀我題  
措語苦澀顏何赧

謝陳惟寅贈其故弟惟允所畫山水



大髯袖中有廬嶽嵐氣噴人寒色薄出贈生綃一幅圖  
云是小髯之所作我嘗游君伯仲間仲今已矣空見山  
畫中無限盤礴意使我坐見愁滿顏重崖複澗迷樵路  
杳杳煙蘿畫如暮溪閣風生醉客眠野橋月出歸僧度  
樾林蒙密楓林高深處似有猩猩號滿空雲凍動秋思  
飛泉落日何蕭騷揮毫若此難再得白鶴何時返鄉國  
良工自古多苦心留賞人間賴遺墨南宮北苑皆已僊  
此圖與之當並傳坐嗟存沒意難報作歌愧匪瓊瑤篇

王行

高房山寒江孤島圖

千山萬山重復重煙嵐草樹深莫窮高堂大軸示寬廣  
要以筆力誇奇雄青紅蒼翠滿縑素缺處殘碧分遙峯  
雖云眼底供一快未見濶遠開心胸歷觀畫史每如是  
意謂此法由來同昨嘗凌秋溯揚子一舸縹緲乘長風  
洪波吞天渺無際出沒但有孤輪紅中冷盤陀瞬息過  
回首浮玉雲濤中乃知山水有佳處到此始覺飛埃空

當時海岳應飽見落墨便自超凡庸不將層疊競工巧  
遂使氣象齊鴻濛平生愛畫惟愛此苦恨妙法無能攻  
九州之表有人物意匠彷彿宗南宮莫言未入米家奧  
百年猶數房山翁茲圖咫尺便千里生綃數幅徒爲功  
亦知盤礴意有在正欲逐米追高蹤愛之歌詠乃常理  
好事況有天隨宗同觀何人江海客氣似貫月書艤虹  
文辭瀾翻沛難禦奔走風雨驅豐隆古稱珠玉在我側  
濡翰自愧言非工黃塵城郭久見困何地閒靜能相容

詩成忽復三歎息  
矯首長望青冥鴻

錢用壬

題趙仲穆彥徵畫馬

吳興畫馬名天下  
文采風流美無價  
子孫兩世皆絕奇  
筆意經營亦相亞  
分明雙馬如雙龍  
玉花對立連錢駝  
圉人緩轡不敢鞚  
矯矯似欲鳴長風  
却想當年落筆時  
省郎侍綵初來歸  
深庭花落白晝靜  
紅門草綠春風微  
回首光陰既非昔  
老者已逝難再得  
中原武騎更馳奔

展卷令人三歎息

魏觀

逢仙嶺

逢仙之嶺皆懸崖下有溪水青於苔丹楓吹過水西去  
白鳥飛上崖邊來行道一翁心甚急石磴磽礧行不及  
前臨絕壑後深巖欲避前呵無處立

劉崧

題吳教授所藏黃大癡畫松江送別圖

是何山莽莽以橫雲水浩浩而生風天低江迴日欲落  
別意乃在蒼茫中問君此圖作者誰浙東老人黃大癡  
松江先生舊知己眼明為寫秋江姿重坡欹岸東南遠  
木末參差見層巘蒼浦遙連楚澤深石林盡帶吳堤轉  
是時先生從此歸把釣欲拂雲中磯長風過雨蒲葦淨  
水色淡沲沾人衣只今又作筠州客惆悵松江渺雲隔  
離思猶迷鴈蕩煙歸心已歷洪崖石我思大癡焉得從  
筆墨往往遺奇蹤草衣騎牛髮如雪吹笛憶過天台峯

平生一筆不輕許，傲睨王侯笑塵土。  
展圖坐對鳳山青，却想高情動千古。  
君不聞，功名利達能幾何。  
長安離別日日多，灞陵亭前春草碧。  
灞陵亭下春風波。

題華陽彭玄明所畫秋山圖

我不識華陽，彭鍊師見畫雲山想。  
句曲數峯暝色入，遙浦六月泉聲動。  
虛谷紫霞樓觀當落日，似有幡幢出林木。  
海邊鰲首戴雲紅，天際蛾眉拂秋綠。  
昔聞天台鴈蕩相鈎連，雲氣來往駕飛仙。  
斷橋溪澗路如棘，嗟爾策蹇

歸何年秋風湖曲波如煙我思東泛吳江船買魚沽酒  
綠荷渚吹笛夜下松門前便尋鍊師覓玄鶴却訪華陽  
窺洞天

題葛洪移居圖

前行白羊四角羸誰其驅者鬚髯兒獐獐一犬嗥而馳  
舉鞭護羊訶止之背有囊琴結黑馳嫗後負畫策以追  
少婦騎牛牛步遲兩兒共載兀不歌大者坐擁斑文狸  
小者索乳方孩嬉母笑不嗔還哢咿復有鬚者肩童羈



引手向翁如反傲蹇驢嗅地行欲疲兩耳逆豎愁風吹  
老翁龐眉方頤頤顧瞻妻子色孔怡似語前行路向夷  
爾兄在前爾勿癡爾母正念爾弟飢高幘髯奚荷且持  
藥瓢囊襍何垂垂有捄者柄相參差傍有二卷一解披  
趁行苦忙奚不知我觀此畫喜復疑問翁為誰莫可推  
或云葛令之官時移家勾漏乃若茲人生多累在侈靡  
如此行李胡不宜骨肉在眼無餘資陳巖作圖真畫師  
筆跡縹緲如飛絲中有妙意世莫窺我吟將為仕者規

如不見畫當求詩

題秋江待渡圖為蕭學士賦

小航衝風岸將及行人下馬沙頭立水濶雲深野渡閒  
天寒日暮歸心急人生行役安可休到江路盡還通舟  
誰能裹足山中老不識風波一日愁

題余仲揚畫山水圖為余自安賦


金華仙人余仲揚筆墨蕭疎開老蒼昨看新圖湖上宅  
煙霧白日生高堂層峯上蟠石鴈鴈絕島下瞰江茫茫

長松並立各千丈，間以灌木相低昂。松下上人坐碧草，  
秋影忽落衣巾涼。囊琴未發弦未奏，已覺流水聲洋洋。  
赤城霞氣通鴈蕩，巫峽雨色來瀟湘。誰能千里坐致此，  
欲往又歎河無梁。風塵漲天蔽吳楚，六年悵望神慘傷。  
玄猿苦啼巖北樹，白鴈不到江南鄉。赭山焚林絕人迹，  
如此山水非尋常。此圖本為自安寫，亦感同姓悲殊方。  
幽軒素壁泉聲動，對此令我心為狂。何由捫蘿逐麋鹿，  
振衣直上雲中岡。登臨一寫漂泊恨，長嘯清風生八荒。

題曾郁文所藏山水小景

隔溪望見林間屋  
沙溆陰陰俯羣木  
溪流合處一橋孤  
春雨來時萬山綠  
江南此景真可憐  
米家筆意誰能傳  
却憶故廬珠浦上  
短籬長繫釣魚船

御選明詩卷三十七



總校官庶吉士臣侍朝

校對官檢討臣蕭九成

謄錄舉人臣傅瓌芳